

TESEMA 1, 2014

LE **OLOMATAMATA**  
FAASILASILAINA LE MALO O IEOVA



**E MAFAI ONA  
E MĀFANA  
ATU I LE ATUA**

O LENEI MEKASINI O Le *Olomatamata* e viia ai leova le Atua, le Pule Silisili Ese aoao. Ua faamāfanafanaina ai fo'i tagata i le tala lelei e uiga i le Malo o le Atua i le lagi, lea e lē o toe umi faai'uina le amioleaga ma avea le lalolagi ma parataiso. Ua uuna'ia e lenei mekasini tagata ia faatuatua iā Iesu Keriso, o lē na maluu ina ia tatou maua le ola e faavavau, ma ua avea nei o ia ma Tupu o le Malo o le Atua. E le'i motusia le lomaiaina o lenei mekasini talu mai le 1879, ma e lē lagolagoina ai faiga faapolotiki. O lenei mekasini e faavae mai i le Tusi Paia.

Pe e te mana'omia ni faamatalaga atili po o se su'esu'ega faale-Tusi Paia i le aiga e aunoa ma se totagi?

Taga'i i le [www.jw.org/sm](http://www.jw.org/sm) pe e tusi atu i se tuatusi o loo ta'ua iinei.

Mo SAMOA:  
Jehovah's Witnesses  
PO Box 673  
Apia

Mo NIU SILA:  
Jehovah's Witnesses  
PO Box 75142  
Manurewa, Auckland 2243

Mo tuatusi uma taga'i i le [www.jw.org/en/contact](http://www.jw.org/en/contact).

E lē faatauina lenei tusi. Ua saunia e a'oa'oina ai le Tusi Paia i le lalolagi aoao, ma ua lagolagoina e ala i foa'i tauofo. Se'i vaganā ua faailoa atu, ae o mau uma o loo i lenei tusi ua sii mai i le faaliliuga *O le Tusi Paia—O le Faaliliuga a le Lalolagi Fou*.

The Watchtower (ISSN 0043-1087) is published semimonthly by Watchtower Bible and Tract Society of New York, Inc.; L. Weaver, Jr., President; G. F. Simonis, Secretary-Treasurer; 25 Columbia Heights, Brooklyn, NY 11201-2483, and in Australia by Watchtower Bible and Tract Society of Australia, 12-14 Zouch Road, Denham Court, NSW 2565. Periodicals Postage Paid at Brooklyn, NY, and at additional mailing offices. **POSTMASTER:** Send address changes to Watchtower, 1000 Red Mills Road, Wallkill, NY 12589-3299. © 2014 Watch Tower Bible and Tract Society of Pennsylvania. Printed in Australia.

## MATAUPU AUTŪ

# E Mafai Ona E Māfana Atu i le Atua

 ITULAU 3-7

- Po o E Māfana Atu i le Atua? 3  
Pe E te Iloa le Suafa o le Atua ma Faaogā? 4  
Po o Lua Talanoa ma le Atua? 5  
Po o E Faia Mea e Finagalo ai le Atua? 6  
O le Olaga Sili Lenei 7

## O LOO IAI FO'I I LENEI LOMIGA

- Timgad—O se Aai ua Mou Atu 8  
Ua Fesili Mai le 'Aufaitau . . .  
O ā Faamatalaga Moni e Faatatau i le Kerisimasi? 11  
“O le Tofā Mamao o le Tagata, e Faagesegese ai Lona Ita” 12  
Pe e Tatau Ona Ou Aitalafu Tupe? 14  
Taliina Fesili Faale-Tusi Paia 16



FAITAU ATILI I LE INITANETI | [www.jw.org](http://www.jw.org)



## OTHER BIBLE QUESTIONS ANSWERED —Is God an Impersonal Force?

(O loo maua i le faa-Peretania: Taga'i i le BIBLE TEACHINGS > BIBLE QUESTIONS ANSWERED)

E MAUA LENEI  
MEKASINI I LE  
INITANETI



## Po o E Māfana Atu i le Atua?



“E te lagona le malupuipua ma le fiafia pe a iai se faiā māfana ma vavalalata ma le Atua. E te lagona e peiseaī o loo faauau ona ua’i mai o ia mo lou lelei.”—CHRISTOPHER , O SE ALII TALAVOU I GHANA.

“E silafia e le Atua ou mafatiaga, ma e alofa ma manatu mamafa mai.”  
—HANNAH, O SE TAMA’ITA’I E 13 TAUSAGA MAI I ALASKA, IUNAITE SETETE.

“O le iloaina o loo iai sa oulua faiā māfana ma le Atua, o se faalogona e matuā tautele ma maua ai le to’afilemu.”—GINA, O SE TINĀ I JAMAICA E PE Ā MA LE 45 ONA TAUSAGA.

E lē na o Christopher, Hannah, ma Gina e iai faalogona faapena. E to’atele tagata e talitonu o loo silasila mai le Atua iā i latou o ni ana uō. Ae faapefea oe? Po o e māfana atu i le Atua? Pe e te mana’o e mafuta vavalalata atu iā te ia? Atonu e te tomānatu: ‘Pe e mafai e tagata ona iai se faiā māfana ma le Atua Silisili Ese? Afai e mafai, e faapefea?’

### E MAFAI ONA E MAFUTA VAVALALATA ATU I LE ATUA

Ua ta’ua i le Tusi Paia, e mafai ona e maua se faiā māfana vavalalata ma le Atua. O loo faamatala i le Tusi Paia na ta’ua e le Atua le augātamā Eperu o Aperamo o “Ia’u uō.” (Isaia 41:8) Se’i mātāu fo’i le valaaulia māfana o loo i le Iakopo 4:8: “Ia outou mafuta vavalalata atu i le Atua, ona mafuta vavalalata mai lea o ia iā te outou.” O lea, e manino mai e mafai ona e maua se faiā vavalalata po o se faauōga ma le Atua. Peita’i, e faapefea ona e “mafuta vavalalata” atu i le Atua ma maua se faiā māfana ma ia, ae e lē vaaia o ia?

Ina ia tali lenā fesili, se’i iloilo le auala e atia’e ai se faauōga a ni tagata se to’alua. E masani ona amata i le iloa e le tasi o le igoa o le isi. Pe a fai ma masani le fetalanoaa’i, fefaaalia’i o la manatu ma faalogona, o le a i’u ina māfana la la’ua faigāuō. E naunau fo’i le isi e faia mea lelei mo le tasi ma atili faamalosia ai pea le faauōga. E faapena le auala e atia’e ai se faiā vavalalata ma le Atua. Se’i o tatou tilofa’ia le auala e faia ai faapea.

# Pe E te Iloa le Suafa o le Atua ma Faaaogā?



E amata se faauōga a ni tagata se to’alua i le iloa e le tasi o le igoa o le isi. Pe e te iloa le suafa o le Atua?

Pe e iai sau uō e te māfana i ai ae e te lē iloa lona igoa? E mautinoa e leai. Na faapea mai Irina o se fafine Bulgaria: “E lē mafai ona e mafuta vavalalata atu i le Atua pe afai e te lē iloa lona suafa.” O le mea e lelei ai, e pei ona ta’ua i le mataupu ua mavae, e finagalo le Atua e tatou te mafuta vavalalata atu iā te ia. O lea, e ala mai i le Tusi Paia, ua ia faailoa mai ai ia lava iā i tatou: “O a’u o Ieova. O lo’u igoa lea.”—Isaia 42:8.

Pe e tāua iā Ieova lou iloa ma faaaogā o lona suafa pe e leai? Se’i mātau le mea lenei: E toetoe 7,000 taimi o loo ta’ua ai le suafa o le Atua i le ulua’i Tusitusiga Paia Eperu. O loo tusia i kone-sane faa-Eperu e fā e ta’ua o le Tetakalamatone. E leai se isi igoa e tele faapea taimi o loo ta’ua ai i le Tusi Paia. O le faaamatoniga lenā e iloa ai, e finagalo Ieova e tatou te iloa ma faaaogā lona suafa.\*

Peita’i e ono manatu nisi, o se lē faaaloalo le faaaogā o le suafa o le Atua ona e paia ma silisili ese o ia. E moni e lē tataua ona tatou faaaogā sesē

\* E faanoanoa ona e tele isi faaliliuga o le Tusi Paia e lē o iai le suafa o le Atua, e ui lava e anoanoa’i taimi o loo ta’ua ai i Tusitusiga Eperu, po o le Feagaiga Tuai. Nai lo lea, ua latou suia le suafa o le Atua i ta’u e pei o le “Alii” ma le “Atua.” Mo nisi faamatalaga atili e faatatau i lenei mataupu, taga’i i le itulau e 195-197 o le tusi *O ā A’oa’oga Moni a le Tusi Paia?* Iomia e Molimau a Ieova.

le suafa o le Atua, e pei lava ona tatou lē faaaogā sesē le igoa o sa tatou uō lelei. Peita’i, e finagalo Ieova i ē e alolofa iā te ia, e faamamalu ma faalauiloa atu lona suafa. (Salamo 69:30, 31; 96:2, 8) Sa a’oa’o fo’i e Iesu ona soo ia tatalo:

**E ala mai i le Tusi Paia, ua faailoa mai ai e le Atua ia lava iā i tatou: “O a’u o Ieova. O lo’u igoa lea.” —Isaia 42:8**

“Lo matou Tamā e o i le lagi, ia faapaiaina lou suafa.” E mafai ona tatou faapaiaina le suafa o le Atua e ala i le faalauiloa atu. O le faia faapea, o le a atili ai ona tatou mafuta vavalalata atu iā te ia.—Mataio 6:9.

O loo ta’ua i le Tusi Paia e manatu mamafa mai le Atua i “ē e manatunatu i lona suafa.” (Malaki 3:16) Ua folafola mai e Ieova iā i latou na: “Ou te puipuia fo’i o ia ona ua ia iloa lo’u igoa. E valaau mai o ia iā te a’u, ona ou tali atu lea iā te ia. Ou te faatasi ma ia i le taimi o puapuga.” (Salamo 91:14, 15) O lea, e tāua tele ona tatou iloa ma faaaogā le suafa o le Atua, pe afai e tatou te fia maua se faiā māfana ma ia.

# Po o Lua Talanoa ma le Atua?



O so o se faauōga māfana lava e fesoota’i  
i le tele o taimi

O so o se faauōga māfana lava e masani ona fesoota’i i le tele o taimi, e tusa pe talanoa faafesaga’i, pe e ala i le telefoni, imeli, vitiō, ma tusi. O lea, ina ia vavalalata atu i le Atua, e tatau ona tatou fesoota’i ma ia e lē aunoa. E faapefea ona faia faapea?

E mafai ona tatou talanoa atu i le Atua e ala i le tatalo. Peita’i, e lē tutusa le tatalo i le Atua ma se talanoaga faasamasamanoa ma sau uō. Pe a tatalo atu i le Atua, e tatau ona tatou iloa o ia o Lē na foafoaina mea, ma o le Silisili Ese i le vateatea aoao. O le iloina o lenā mea moni, e uuna’ia ai i tatou e matuā faaaloalo atu iā te ia. Ina ia faafogaina e le Atua a tatou tatalo, e iai vala e tolu e mana’omia ona tatou faia.

Muamua, e tatau ona taula’i sa’o atu a tatou tatalo iā Ieova le Atua, ae e lē o Iesu, sagato, po o ni tupua. (Esoto 20:4, 5) Ua faapea mai le Filipi 4:6: “Ia faailoa atu o outou mana’oga i mea uma lava i le Atua, i le tatalo ma le faatoga, atoa ma le faafetai.” Lua, o tatalo uma e tatau ona auala atu i le suafa o Iesu Keriso, ma sa faamauti-noa mai e Iesu lava ia le manatu lenei: “E leai se tasi e alu atu i le Tamā pe a lē ui mai iā te a’u.” (Ioane 14:6) Tolu, e tatau ona ōgatusa a tatou tatalo ma le finagalo o le Atua. Ua ta’ua i le 1 Ioane 5:14: “Po o ā lava mea tatou te talosaga atu

ai e tusa ma lona finagalo, e faafofoga mai lava o ia iā i tatou.”\*

O le mea moni, e lē tumau se faauōga pe a faumālō le tasi i le talanoaga. I le pei o se faauōga māfana e fetalanoa’i, e tatau ona tatou faataga le Atua e talanoa mai, ma e tatau ona tatou faalogo atu iā te ia. Pe e te silafia le auala e talanoa mai ai le Atua iā i tatou?

I aso nei, o loo “talanoa” mai Ieova iā i tatou e ala mai i lana Afioga, le Tusi Paia. (2 Timoteo 3: 16, 17) Aiseā ua tatou manatu ai faapea? Mafau-fau i le tulaga lenei: Pe a e maua se tusi mai i sau uō, e peisea’i o loo talanoa mai o ia iā te oe e ui lava e te lua lē o faatasi. I se tulaga talitutusa, e tatou te faataga le Atua e talanoa mai iā i tatou, e ala i le faitau o le Tusi Paia. Na faapea mai Gina lea na ta’ua i le mataupu muamua: “Pe afai ou te mana’o e silasila mai le Atua iā te a’u o sana uō, e tatau la ona ou faitau i lana ‘tusi’ mo i tatou, o le Tusi Paia.” Na ia toe faapea mai: “O le faitauina o le Tusi Paia i aso ta’itasi, ua atili ai ona ou vavalalata atu i le Atua.” Po o e faataga Ieova e talanoa mai iā te oe, e ala i le faitau o lana Afioga i aso ta’itasi? O lou faia faapea, o le a atili ai ona e vavalalata atu iā te ia.

\* Mo nisi faamatalaga e faatatau i le auala e mafuta vavalalata atu ai i le Atua i le tatalo, taga’i i le mataupu e 17 o le tusi *O ā A’o-a’oga Moni a le Tusi Paia?* lomia e Molimau a Ieova.

# Po o E Faia Mea e Finagalo ai le Atua?



E tatou te fiafia e fai mea lelei i ē e tatou te alolofa ma faaaloalo i ai

“E na ona ta’u mai lava o le mea e te mana’o ai, faitalia a’u ma fai.” Pe e te faia lenā faamatalaga i se tagata e te lē masani lelei i ai? E leai. Peita’i, e leai se faalētonu o lou fai atu o lenā faamatalaga i sau uō mamae. O se faigāuō lelei, e faigo-fie ona fai e le tasi se mea lelei mo le isi.

Ua faailoa mai i le Tusi Paia, e faia e lē aunoa e le Atua mea lelei ina ia faafiafia ai ona tagata tapua’i. O se faata’ita’iga, na faapea mai le tupu o Tavita, o lē na iai sa la’ua faiā māfana ma le Atua: “E tele lava mea ua e faia, Ieova e, lo’u Atua, e oo lava i au galuega ofoofogia ma ou manatunatuga iā i matou; . . . ua matuā tele lava, ua lē mafaitaulia.” (Salamo 40:5) Ae e sili atu i lenā, o loo faia fo’i e Ieova mea lelei e faafiafia ai ē e lē o iloa o ia, e ala i le ‘foa’i mai o le anoanoa’i o mea’ai ma ua tutumu ai o latou loto i le olioli.’—Galuega 14:17.

Talu ai o loo faia e Ieova mea e faafiafia ai isi, ua alagatau fo’i la ona ia faatalitalia ē e manana’o e ave ma ana uō, ia faia mea e ‘faafiafia ai lona loto.’ (Faataoto 27:11) O ā la ni mea patino

e tatau ona e faia ina ia faafiafia ai le Atua? Ua ta’ua i le Eperu 13:16: “Aua ne’i galo le faia o mea lelei, ma le tufa atu o mea i isi, auā o tau-laga faapena e matuā fiafia i ai le Atua.” Po o lona uiga e pau le auala e faafiafia ai le Atua, o le faia o mea lelei ma le tufa atu o mea i isi?

Ua ta’ua i le Tusi Paia: ‘A aunoa ma le faatua-tua e lē mafai ona faafiafiaina ai le Atua.’ (Eperu 11:6) Manatua, na muamua “faatua-tua Apera-amo iā Ieova,” ae mulimuli ane “ta’ua ai o ia o le ‘uō a Ieova.’” (Iakopo 2:23) Na faamamafa fo’i e Iesu le tāua o le “faatua-tua i le Atua” pe afai e tatou te fia maua Ana faamanuiaga. (Io-ane 14:1) O lea, e faapefea ona tatou maua le faatua-tua lea e finagalo i ai Ieova? E amata i le su’esu’e e lē aunoa o lana Afioaga. O le faia faapea, o le a e maua ai le “poto sa’o i lona finagalo,” ma iloa le auala e “matuā faafiafiaina ai o ia.” A o faatupula’ia lenā poto sa’o e faatatau iā Ieova, ma e faatatauina mea e na te faafinagalo-ina, o le a tuputupu a’e lou faatua-tua ma e matuā vavalalata atu ai iā te ia.—Kolose 1:9, 10.

# O le Olaga Sili Lenei

O le ā e tatau ona e faia ina ia valalata atu ai i le Atua? Ua mǎe’ā ona tatou iloilo ina vala o mulimuli mai ina ia atia’e ai se faia valalata ma le Atua:

1. Iloa ma faaaogā lona suafa, o Ieova.
2. Talanoa e lē aunoa ma ia, e ala i le tatalo ma su’esu’e lana Afioga, le Tusi Paia.
3. Faaauau ona faia mea e finagalo ai o ia.

E tusa ai o nei vala, po o e faia mea e mana’omia ina ia valalata atu ai i le Atua? Pe e iai ni vala e tatau ona e faaleleia? E moni e mana’omia ni taumafaiga, ae se’i manatu i i’uga e maua mai ai.


Na faapea mai Jennifer mai i le Iunaite Setete: “E tauia taumafaiga uma ina ia atia’e se faia valalata ma le Atua. O lenei faia e maua ai le tele o faamanuiaga: o le a atili ai ona tatou maufaatuaina le Atua, iloa lelei ona uiga, ae sili ai o le a matuā faamalosia lo tatou alofa mo ia. O le olaga sili lenei.”

Pe a e mana’o e atia’e ma maua se faia māfana ma le Atua, e fiafia Molimau a Ieova e fesoasoani atu, e ala i le faia o sau talanoaga faale-Tusi Paia e aunoa ma se totogi. E valaaulia fo’i ma le māfana oe e auai i a latou sauniga faale-Tusi Paia i se Maota mo Sauniga e lata ane, ma o le a e aufaatasi ai ma i latou e faatāua la latou faia ma le Atua.\* O le faia faapea, o le a pei ai ou faalogona o le faisalamo o lē na faapea mai: “A o a’u nei, ou te faalatala atu i le Atua ou te lelei ai.”—Salamo 73:28. ■

\* Pe a e fia talosaga mo se su’esu’ega faale-Tusi Paia pe fia iloa se Maota mo Sauniga e lata ane, faamolemole talanoa i lē na tuuina atu lenei lomiga, pe taga’i i la matou upega tafailagi, [www.jw.org/sm](http://www.jw.org/sm), i le ulutala FAAFESOOTA’I MAI I MATOU i le pito i lalo o le itulau autū.



Ia mafuta valalata atu i le Atua e ala i le faaaogā o lona suafa, tatalo atu iā te ia, su’esu’e lana Afioga, ma fai mea e fiafia i ai lona finagalo





# Timgad

## O SE AAI UA MOU ATU

**I** LE 1765, na faate'ia ai James Bruce mai Sikotilani, o se tagata su'esu'e sogasogā, ina ua ia vaايا se vaega o le faitoto'a tele o le manumalo a Roma o loo tanumia i le toafa i Algeria. Peita'i e na te le'i iloa o loo tū o ia i luga o toega o le aai aupito i telē o Roma na fausia i Aferika i Mātū, o le aai o Thamugadi, lea ua ta'ua nei o Timgad.

I le 1881, i le silia ma le 100 tausaga mulimuli ane, na amata eli ai e tagata su'esu'e mai Falani toega o mea o Timgad. Na latou faapea mai, e ui e tū lenei aai i se laufanua e lafulafuā, ae sa tamaoaiga ma na sologa lelei olaga o i latou na mau ai. O le ā na uuna'ia ai tagata Roma e fausia se aai tamaoaiga i lenā vaipanoa? O ā lesona e tatou te a'oa'oina mai i lenā aai anamua ma ona tagata?

### SE FUAFUAGA FAAPOLOTIKI SA NATIA

Ina ua faalautele atu le pulega a Roma i Aferika i Mātū i le senituri muamua T.L.M., na latou fetaita'i ma ni teteega malolosi mai i tagata mau-mausolo o lenā vaipanoa. O lea, o le a faapefea ona mau se leleiga a Roma ma na tagata? Muamua, na fausia e fitafita mai le Third Augustan Legion ni togālauapi malupuipua ma ni nofoaga mo fitafita, i atumauga o le vaipanoa ua ta'ua nei

o Algeria i mātū. Mulimuli ane, ona latou fausia lea o le aai o Timgad, ae e ese le fuafuaga na latou faia ai faapea.

O le māfuaaga faaletulafono na fausia ai e Roma le aai o Timgad, e mo fitafita ua litaea. Peita'i na latou natia le fuafuaga autū o le fausia o lenā aai, ina ia faaitiitia ai osofa'iga a tagata o lenā vaipanoa. Na taulau le fuafuaga a Roma. O le olaga sologa lelei i Timgad, na tosina atu ai tagata o lenā vaipanoa ona na faatau atu i ai a latou oloa. Na manana'o le to'atele e nonofo i Timgad, peita'i e na o tagatānuu Roma sa mafai ona nonofo ai. O lea na lotomalilie ai le to'atele e auuuna i le 'autau a Roma mo le 25 tausaga, ina ia avea ai i latou ma o latou atalii, ma tagatānuu o Roma.

E le'i faamalieina nisi o tagata Aferika i le tau ina avea ma tagatānuu o Roma, ae na manana'o fo'i i ni tulaga aloa'ia i Timgad ma isi aai na pu-lea e Roma. Sa matuā taulau le fuafuaga faalilolilo a Roma e faatosina mai tagata o lenā vaipanoa, auā i le na o le 50 tausaga talu ona faavae Timgad, ae ua faatumulia i tagata Aferika i Mātū.

### LE AUALA NA FAATOSINA ATU AI TAGATA

Na faapefea ona vave taulau tagata Roma i le faatosinaina atu o tagata o lenā vaipanoa? Sa la-



tou faatāua le aiā tutusa a tagatānuu, o se ta'iala na a'oa'o e Cicero, o se alii tāua o Roma. Sa vaevae tutusa fanua i fitafita Roma ua litaea ma tagata Aferika ua avea ma tagatānuu o Roma. Na vaevaeina lelei fanua, e ta'i 65 futu (20 mita) faatafafa le tetelē o poloka, ae e iai auala vaiti na va ai fanua. O na fuafuaga maopoopo sa tosina atu ai tagata i Timgad.

I le pei o le tele o isi aai o Roma, e masani ona feiloa'i tagata i nofoaga e pisi ai fefaataua'iga, ina ia faalogologo i tala fou pe fai ai taaloga. E maotino na moomoo atu tagata mai i lenā vaipanoa maugā, e fia savalivali i lalo o faapaologa o fale o Timgad i se aso mugālā, pe faamālū i le tele o ona fale ta'ele tetele e aunoa ma se totogi. Atonu fo'i na latou mafaufau ma'imau pe ana latou nofonofo i autafa o se vai, ma talatalanoa ai ma uō. O na mea uma sa pei o ni miti iā i latou.

Sa tosina atu fo'i tagata i le nofoaga telē taalaelae e fai ai faaaliga. E silia i le 3,500 tagata e ofi i lenā nofoaga, ma sa faatumulia i le 'au mata-mata pisapisaō o Timgad ma taulaga taulalata ane. Na faatino e tagata i inā ni tala e atagia atu ai faafiagiaga lē mamā ma sauā, ia na fialia i ai tagata Roma.

Na iai fo'i le vaega a lotu o Roma i le faatosina-ina atu o tagata. Sa teuteuina fola ma puipui o fale tā'ele tetele i ata e faia mai i tioata ma maa felanulanua'i, na faamatala ai talafatu faapaupau e fesoota'i atu i o latou talitonuga faalotu. Talu ai sa tāua le tā'ele i aso ta'itasi, e le'i umi ae masani tagata i atua ma lotu o Roma. Na iloa le taulau o le fuafuaga a Roma, auā e oo lava i faatusa e fesoota'i atu i ē ua maliliu, na vane faatasi ai ata o atua e to'atolu o Roma ma lenā vaipanoa.


### UA MOU ATU SE AAI MATAGOFIE

Ina ua faavaeina e le Emeperoa Roma o Trajan le aai o Timgad i le 100 T.A., sa uuna'ia e tagata Roma le gaosia o le suāuu olive, uaina ma oloa e maua mai i saito, i totonu o Aferika i mātū atoa. Na avea lenā vaipanoa ma nofoaga autū e maua ai saito, suāuu olive, ma uaina a Roma ma ona kolone. I le pei o isi kolone, sa malosi le tamao-iga o Timgad i lalo o le pulega a Roma. Na faa-

solo ina faatupula'ia le aofa'i o tagata o Timgad, ma i'u ai ina faalautele atu ona tuaoi.

E tele faamanuiaga na maua e tagata o le aai ma i latou e ana fanua mai i fefaataua'iga ma Roma, ae sa itiiti tupe na maua e le 'aufaifaato'aga. O lea, i le senituri lona tolu T.A., na tetee ai le 'aufaifaato'aga faasaga i faiga lē tonu i le va-fealoa'i o tagata, ma le maualuluga o lafoga. O nisi o i latou na lolotu i le Katoliko, na auai i se vaega e ta'ua o le *Donatist*, o ē na faapea mai o ni Kerisiano ma na tetee i faiga lē tonu a le lotu Katoliko.—Taga'i i le pusa "O le *Donatist*—E Lē o se 'Lotu Moni.'"

Ina ua mavae le tele o senituri o fetaua'iga i le lotoifale ma osofa'iga mai i isi atunuu, na mou atu ai loa taa'iga malolosi a Roma na iai i Aferika i mātū. E oo ane i le senituri lona ono T.A., ua



•• Timgad

I le maketi o loo iai ni pou tetelē mo faapaologa

Se faatusa e fesoota'i i ē ua maliliu o loo iai ata o atua e to'atolu



© Neurdin/Roger-Viollet

## O le *Donatist*—E Lē o se ‘Lotu Moni’

I le itu i sisifo o Timgad, o loo iai toega o se malumalu mata’ina e iai se faatanoa mo papatisoga. Ua toe faamanatu mai ai, e oo ane i le senituri lona fā T.A., e to’atele ua auai i le *Donatist*—o se vaega ua faapea mai o Kerisiano, ua vavaeese mai i le lotu Katoliko Roma.

E le’i fiafia le vaega o le *Donatist* i le aiā o Emeperoa Roma i meafai a le lotu Katoliko. Sa latou manatu

iā i latou lava o se ‘lotu moni,’ o ē ua vavaeese mai le lalolagi. Ae e le’i ōgatusa a latou upu ma gaoi-oiga. Na fai le vaega a le *Donatist* i feeseesea’iga i le vafealoa’i a tagata ma faiga faapolotiki, ma na latou lagolagoina le ‘aufaifaato-’aga ia fouvale i ē e ana fanua ma le ‘auaolafoga Roma, ma na i’u ai ina tele faasāsāaga faasaga iā i latou. E ui i faamatalaga a le ‘au *Donatist*, ae e le’i aveia i latou ma ‘lotu moni.’—Ioane 15:19.

O le faatanoa mo papatisoga e iloa ai le talaaga o Timgad o ni “Kerisiano”

susunu e tagata Arapi sa i Aferika i mātū le aai o Timgad, ma mou atu ai i le silia i le 1,000 tausaga.

### “O LE SA’O LEA O LE OLAGA!”

Na maofa tagata su’esu’e na eliina toega o mea, ina ua latou tau i se faaupuga Latina na vaneina i se tasi o nofoaga i Timgad e faapea: “O le tuli manu, tā’ele, taalo, ma le ‘ata—o le sa’o lea o le olaga!” Na faapea mai se tusitala o tala-faasolopito mai Falani, o lenā faaupuga “atonu e faaalua ai le lē naunau e faia se mea, ae ua manatu nisi e faapea o le ki lea mo le atamai.”

O le mea moni, na umi se taimi o ola tagata Roma i se olaga soonafai. Na ta’ua e le apositolo o Paulo, o se Kerisiano mai le ulua’i senituri, sa

manatu tagata i le olaga e faapea, ‘Se’i o tatou aai ma inu auā o a taeao e tatou te feoti ai.’ E ui i le mapolotu o tagata Roma, ae sa ola tau lava o le asō, e aunoa ma le manatunatu i le fuafuaga ma le uiga moni o le olaga. Na lapata’ia e Paulo Kerisiano e faatatau i na tagata e faapea: “Aua ne’i faasesēina outou. O aumea leaga e faaleagaina ai mea lelei ua masani ai tagata.”—1 Korinito 15: 32, 33.

E ui ua pe ā ma le 1,500 tausaga talu ona lē toe iai Timgad ma ona tagata, ae e oo mai lava i aso nei, o loo taatele pea o latou manatu e uiga i le olaga. E talitonu nisi e sa’o le manatu o tagata Roma e faatatau i le olaga, e tusa lava po o ā āuga. Peita’i, e puupuu ae e moni upu o le Tusi Paia e faapea: “O loo suia le tulaga o mea a lenei lalolagi.” O lea ua tima’ia ai i tatou ia aua le faaaogāina atoatoa mea a le lalolagi.—1 Korinito 7:31.

O toega o mea o Timgad, e iloa ai o faaupuga na vaneina i se tasi o ona nofoaga, e lē o le auala lea e maua ai le fiafia moni. Nai lo o lea, o le ki i le mauaina o le fiafia moni, o le utagia lea o le fautuaga a le Tusi Paia e faapea: “E mavae atu fo’i le lalolagi faapea ma ona tu’inanauga, a o lē e faia le finagalo o le Atua e tumau e faavavau.”—1 Ioane 2:17. ■

O le faaupuga Latina o loo vaneina i se tasi o nofoaga: “O le tuli manu, tā’ele, taalo, ma le ‘ata—o le sa’o lea o le olaga!”



## O ā faamatalaga moni e faatatau i le Kerisimasi?

E eseese māfuaaga ua faamanatu ai e le faitau miliona i le lalolagi aoao le Kerisimasi. O nisi o le taimi lea e fiafia faatasi ai ma aiga ma uō, a o isi o le taimi lea e mafaufau ai i le Atua pe fesoasoani i tagata matitiva. O nei gaoioiga uma e lelei, peita'i e iai sona fesoota'iga i itu lē lelei o le Kerisimasi.

Muamua, e talitonu i latou o loo faamanatuina le Kerisimasi o le aso lea na fanau ai Iesu. Peita'i, ua faaalua e nisi o tusitala o talafaasolopito, e lē o iloa tonu le aso na fanau ai Iesu. Ua ta'ua i le tusi *The Christian Book of Why*, “na mumusu Kerisiano i le ulua'i senituri e faatulaga se aso e faamanatu ai le fanau mai o Iesu.” Sa manana'o e “vavaeesea i latou lava mai i so o se faiga faapaupau.” O le mea moni, e augapiu ma se faamatalaga i le Tusi Paia e iloa ai na faamanatu e Iesu lona lava aso fanau, po o aso fanau o isi. Nai lo lea, na ia poloa'ia ona soo ia faamanatu le aso na maliu ai.—Luka 22:19.

Lua, e talitonu le to'atele o tagata atamamai, o le tele o tū o le Kerisimasi e lē faa-Kerisiano, ma na amata mai i ni aganuu faapaupau. E aofia ai le tamā o le Kerisimasi, laau Kerisimasi, fesuia'iga o meaalofo, tutuina o moliga'o, tautau pale teuteu i luma o fale, ma pesepesega o le Kerisimasi. E tusa ai ma nei tū masani, na ta'ua i le tusi *The Externals of the Catholic Church*: “Pe a tatou avatu pe maua se meaalofo o le Kerisimasi, ma tautau ni pale i o tatou fale ma falesā, e to'afia nisi o i tatou e iloa atonu o loo tatou faamanatuina ni tū faapaupau?”

Ae atonu e te taumānatu, po o le ā le afāina o le faia o nei mea auā e foliga mai o ni mea e lelei. Peita'i, e maua le tali i le manatu lona tolu lelei. E inosia e le Atua le faafilogia o le tapua'iga mamā ma tū faapaupau. E ala mai i lana perofeta o Amosa, na fetalai atu le Atua i tagata tapua'i lē usiusita'i i Isaraelu anamua: “Ua ou 'ino'ino, ua ou teena a outou tausamiga . . . Ia aveese mai iā te a'u le taalili o au pese.”—Amosa 5:21, 23.

Aiseā e matuā malolosi ai na faaupuga? Se'i iloilole le mea na faia e tagata o le malo i mātū o Isaraelu anamua. Na faia e lo latou tupu o Ierepoamo ni tama'i povi auro se lua, ma tuu le tasi i Tanu a o le isi i Peteli. Sa ia uuna'ia tagata ia tapua'i atu i nei povi auro nai lo o le tapua'i atu iā Ieova i le malumalu i Ierusalem. Na faia fo'i e le tupu ni tausamiga ma tofia ni ositaulaga e fesoasoani i tagata e faamanatu nei tausamiga.—1 Tupu 12: 26-33.

O nei mea na faia e tagata Isaraelu na foliga mai e lelei. Auā sa latou faia nei gaoioiga uma ma le manatu e tapua'i ai i le Atua ma faafiafia o ia. Ae na faaalua i fetalaiaga a le Atua e ala mai i le perofeta o Amosa ma isi perofeta, lona finagalo e faa-

**“Pe a tatou avatu pe maua se meaalofo o le Kerisimasi, ma tautau ni pale i o tatou fale ma falesā, e to'afia nisi o i tatou e iloa atonu o loo tatou faamanatuina ni tū faapaupau?”**

—*The Externals of the Catholic Church*

tatau i na gaoioiga. Na fetalai le Atua i le Malaki 3:6: “O a'u o Ieova; ou te lē liliu lava.” Pe e tatou te lē iloa mai ai iinei, faalogona o le Atua e tusa ai o le faamanatuina o le Kerisimasi?

E to'atele ua filifili e faamamao mai i le faamanatuina o le Kerisimasi, ina ua latou iloiloina faamatalaga moni o loo ta'ua i luga. Peita'i, ua latou maua le fiafia ma le faamalieina moni, i le faaalua o lo latou taimi e fiafia ai ma uō ma aiga, ma fesoasoani i tagata matitiva i so o se taimi o le tausaga. ■

# “O le Tofā Mamao o le Tagata, e Faagesegese ai Lona Ita”

Na faamālōlō le faia’oga o se ‘autaaalo ona o le lē pulea o lona ita.

O loo faalii se tamaitiiti ona ua lē faia le mea na mana’o ai.

Na tauupu se tinā ma lana tama, ona e le’i tapenaina lona potu.

**U**A TATOU vāai uma lava i se tagata ae ita, ma e iai fo’i taimi e tatou te feita ai. E ui e tatou te iloa o le ita o se uiga e tatau ona ‘alofia, ae o nisi taimi e tatou te manatu ai e iai māfuaaga tatau e ita ai, aemaise pe a faia e se tasi se gaoioiga e lē fetauti. Ua ta’ua i se tusi a se faalapotopotoga i Amerika e su’esu’eina le mafaufau (American Psychological Association), “o le ita o se uiga faaletagata e masani ai, ma e lelei.”

E ono foliga mai e sa’o lenā manatu, pe a fua i upu a le aposetolo o Paulo. I le iloaina e iai taimi e tatou te feita ai, na faapea mai o ia: “Pe a outou ita, aua ne’i agasala ai, aua ne’i goto le lā o tumau pea lo outou ita.” (Efeso 4:26) Afai o le tulaga lenā, pe e talafeagai la ona faapasae a’e lou ita, pe e tatau ona pulea?

## PE E TATAU ONA E ITA?

Ina ua ta’ua e Paulo lenā fautuaga e faatatau i le ita, atonu sa ia manatunatu i upu a le faisalamo: “Pe a outou atuatuvaile, aua ne’i agasala ai. Ia outou fai ifo i o outou loto i luga o o outou moga, ma ia ffilemu.” (Salamo 4:4) O le ā le uiga o upu faagaeina a Paulo? Na ia faamatala atili mai: “Ia tuu lo outou ita umi, ma le itaitagofie, ma le lotoa, ma le soona ‘e’ē, ma upu masoā, atoa fo’i ma mea leaga uma.” (Efeso 4:31) O loo faalaeiau iinei e Paulo Kerisiano ia ‘alofia le lē puleaina o le ita. Na ta’ua atili i le tusi a le American Psychological Association: “Ua iloa mai i se su’esu’ega, o le faapasae o le ita e atili ai ona ita ma lē fiafia,



E faapefea ona pulea lou ita?

ma e lē fesoasoani iā te oe . . . e fo’ia ai le faafitauli.”

E faapefea ona tatou “tuu” le ita ma ona aafiaga leaga? Na tusi le tupu poto o Isaraelu anamua o Solomona: “O le tofā mamao o le tagata, e faagesegese ai lona ita, ma e matagofie fo’i lona lē manatua o le agaleaga.” (Faataoto 19:11) E faapefea i le “tofā mamao o le tagata” ona fesoasoani iā te ia pe a oso a’e lona ita?

## LE AUALA E FAAGESEGESE AI E LE TOFĀ MAMAO LE ITA

O le tofā mamao, o le tomai lea e malamalama lelei ai i se mea o loo tupu, faapea āuga o se ga-

oioiga. E faapefea ona fesoasoani lenā uiga iā i tatou pe a faatigā mai se isi?

E ono mapuna a'e lo tatou ita pe a vaaia ni faiga lē tonu. Peita'i, pe a lolo atu i o tatou faaloga ma tali atu i se auala sauā, e tatou te ono afāina ai pe aafia ai fo'i isi. E pei o se afi ua sasao a'e ma mū ai se fale, e faapena fo'i pe a lē pulea lo tatou ita, e faaleagaina ai lo tatou talaaga ma faiā ma isi, aemaise le Atua. Pe a e lagona ua e ita, ia mafaufau lelei i le tulaga ua tula'i mai ma le i'uga e ono oo i ai pe a faapasae atu lou ita. O le malamalama lelei i le mea o loo tupu, o le a fesoasoani e pulea ai o tatou faaloga.

Na sao mai le tupu o Tavita, o le tamā o Solomona, mai le nofosala i le faamasaatoto iā Napalu, ina ua malamalama i le tulaga o loo tupu. Na puipuia e Tavita ma ona tagata lafu mamoe a Napalu i le toafa o Iutaia. Ina ua oo i le taimi e sele ai fulufulu o mamoe, sa talosaga atu Tavita iā Napalu mo ni mea'ai. Ae na tali mai Napalu: "Po ou te avatu ea a'u mea'ai, o vai, o aano o manu ua fasia mo ē e sele fulufulu o a'u mamoe, ma foa'i atu i tagata ou te lē iloa po o fea e latou te o mai ai?" E ese le tigā o nei faaupuga! Ina ua faalogo Tavita i na faamatalaga, ona o atu lea ma ana tagata e tusa ma le to'afā selau, ina ia fasio-tia Napalu ma tane uma o lona aiga.—1 Samuelu 25:4-13.

Ina ua faalogo Apikaila le avā a Napalu i le mea na tupu, sa alu atu loa e faafetaui Tavita. Ina ua feiloa'i ma Tavita ma ana tagata, sa faapa'ū i ona vae ma faapea atu: "Se'i e faafofoga mai faamolemole i lau teine pologa a o tautala atu iā te oe, ma faafofoga mai i upu a lau teine pologa." Ona ia faamatala atu lea iā Tavita le valea o Napalu, ma faailoa atu āuga o le a oo i ai pe a ia tauimasui ma faia le faamasaatoto.—1 Samuelu 25:24-31.

O le ā na iloa e Tavita mai i upu a Apikaila, ma 'alofia ai se faalavelave mata'utia? Muamua, na iloa ai e Tavita o le natura lava o Napalu e valea, ma lona lua, na iloa ai e Tavita o le a ia nofosala i le toto pe a ia tauimasui. I le pei o Tavita, atonu e iai se taimi e te matuā ita ai lava. O le ā e tatau

ona e faia? Na faapea mai se tusitusiga a le Mayo Clinic i le auala e pulea ai le ita: 'Ia faitau sekone e 10 ma mānava tele i totonu.' Ioe, ia mafaufau lelei po o le ā le pogai o le faafitauli, ma po o ā āuga e ono i'u iai au gaoioiga. Ia faagesegese pe faate'a e le tofā mamao lou ita.—1 Samuelu 25:32-35.

E to'atele tagata ua taulau i le puleaina o lo latou ita. Na faamatala e Sebastian, o se pagota e 23 tausaga i se falepuipui i Polani, ua mafai nei ona ia pulea lona ita ma faaloga lē lelei, e ala i le su'esu'eina o le Tusi Paia. Na ia ta'ua: "E muamua lava ona ou mafaufau i le faafitauli, ona ou taumafai lea e faatatau fautuaga a le Tusi Paia. Ua ou iloa ai o le Tusi Paia o le tusi ta'iala sili."

O le mea fo'i lenā sa faia e Setsuo. Na ia faapea mai: "E masani ona ou avaavau i isi i le galuega pe a ou ita. Ae o lea ua ou su'esu'eina le Tusi Paia, o lea, nai lo o le avaavau atu, ou te fesili muamua ifo: 'O ai e sesē? Pe e lē o a'u le pogai o le faafitauli?'" O le mafaufau i na fesili na faagesegese ai lona ita, ma mafai ai ona pulea ona faaloga lē lelei.

E malolosi faaloga ita, ae e sili atu ai ona malosi aafiaga o fautuaga mai i le Tusi Paia. Pe a faatatau fautuaga atamai o le Tusi Paia ma tatalo mo le fesoasoani a le Atua, o le a mafai fo'i e le tofā mamao ona faagesegese pe pulea lou ita. ■

O le faatatauina o fautuaga a le Tusi Paia e mafai ona pulea ai ou faaloga lē lelei



# Pe e Tatau Ona Ou Aitalafu Tupe?

“O le aitalafu e tai pei o se faaiipoipoga, ae o le toe totogiina atu e tai pei o loo faavauvau.”

—O se alagāupu i le gagana Swahili.

**O** LENEI alagāupu ua masani ai tagata i Aferika i Sasa'e, ma ua faaalua mai ai le manatu o loo iai i le to'atele o tagata i le lalolagi. Pe e faapena ou faalogona e faatatau i le aitalafuina o tupe mai i sau uō po o se isi? E ui e foliga mai e lelei le aitalafu i nisi taimi, ae pe e talafeagai lea faiga? O ā ni lamatiaga o le aitalafu?

Ua faailoa mai fo'i i se isi alagāupu i le gagana Swahili le lamatiaga o le aitalafu. Ua faapea mai: “O le aitalafu ma le nonō atu e faaleagaina ai se faigāuō.” E tusa pe e iai ni māfuaaga talafeagai na faia ai e se tasi se aitalafu, ma sa iai sana auala e toe totogi atu ai, ae e iai lava tulaga lē faatalitalia e ono tula'i mai. O se faata'ita'iga, e ono lē fiafia lē e ana le tupe pe afai ua mavae le aso na tatau ona totogi atu ai, ae e le'i totogiina atu lava. O le a tula'i mai ni feeseesea'iga i le va o lē e ana le tupe ma lē na aitalafu, ma e ono aafia ai fo'i o la aiga. O lea, talu ai o le faia o aitalafu e ono i'u ai ina feeseesea'i ma isi, e ao la ona tatou taumafai e 'alofia le faia o ni aitalafu.

O le aitalafu o tupe e mafai fo'i ona aafia ai le faia a se tasi ma le Atua. E faapefea? Ua ta'ua i le Tusi Paia, o sē e aitalafu ae e lē mana'o e toe totogi atu le tupe, o ia o se tagata amioleaga. (Salamo 37:21) O loo ta'ua manino fo'i i le Faata-



oto 22:7: “E fai ma auauna le tagata aitalafu i le tagata na nonō mai ai.” E tatau ona iloa e le tagata o loo aitalafu, e faato'ā sa'oloto o ia pe a uma ona totogi atu le tupe. Ua faapea mai se isi alagāupu faa-Aferika: “Pe a e aitalafuina vae o se tagata, e te mulimuli lava i le mea e ta'ita'i ai oe e lenā tagata.” O lona uiga, e lē pule lē na aitalafu i le mea e fai, ae e tatau ona mulimuli i le maliega na faia ma lē e ana le tupe.

O lea la, e ao ona totogi muamua aitalafu ina ia 'alofia ai feteena'iga. O le faaputupu o aitalafu e i'u ai i le soona popole, lē lelei le moe, galue ovataimi, misa i va o ulugalii, malepelepe aiga, ma molia i le tulafono. E atamai tele la le fautuaga i le Roma 13:8: “Aua ne'i o outou nofo

## “O le iai o se vaaiga faaleagaga e tusa ai o meafaitino, o le a avea lea o se puipuiga”

aitalafu i se tagata ae e tau lava o le alofa o le tasi i le isi.”

### PE E AO ONA OU AITALAFU?

E tusa ai o nei manatu na iloiloaina, e tāua tele ona faaeteete pe a faia aitalafu. Ia fesili ifo: Po o mana’omia moni lava ona ou faia se aitalafu? Po o o’u aitalafu ina ia tausia ai lo’u aiga? Pe e mǎfua ona o lo’u matape’ape’a, ma mana’o ia maua mea ou te lē o gafatia? O le mea moni, e sili atu le lotomalie i mea ua mafai ona e maua.

E moni e iai lava tulaga lē ma’alofia e tula’i mai ma e ono mana’omia ai ona faia se aitalafu. Peita’i, e tatau lava i lē ua mafaufau e fai se aitalafu ona gaoioi ma le faamaoni. E faapefea?

Muamua, ia aua ne’i o tatou faaaogāina se tasi ona e faapea e tamaoaiga atu nai lo o isi. Ia ‘alofia le manatu e tatau i ē e tamaoaiga ona fesoasoani mai iā i tatou i le itu tautupe, ma e lē afāina pe a tatou lē totogiina atu a latou tupe. E lē tatau ona tatou matau’a i olaga o i latou e foliga mai o loo maua mea.—Faataoto 28:22.

Peita’i, ia faamautinoa e vave ona toe totogi atu lau aitalafu. Afai e lē ta’uina mai e lē e ana le tupe se aso e mana’omia ona totogi ai le aitalafu, ia tausolomua oe e ta’u atu se aso patino ma ia tausisi i au upu. E lelei fo’i ona iai se lua maliega tusitusia ina ia ‘alofia ai le feeseesea’i o manatu. (Jeremia 32:9, 10) Afai e mafai, ia e alu sa’o i le tagata e ana le tupe e totogi i ai ma faafetai i ai. O le faaalua o le faautauta i le totogiina o lau aitalafu o le a maua ai ni faia’i lelei. Na fetalai Iesu i lana Lauga i le Mauga: “A ia avea la outou upu o le *Ioe*, ia *Ioe*; ma le *Leai*, ia *Leai*.” (Mataio 5:37) E lē gata i lea, ia manatua le Tulafono Faaauro: “O lenei, o mea uma tou te manana’o e faia mai e tagata iā te outou, ia faapea lava ona outou faia iā i latou.”—Mataio 7:12.

### TA’IALA AOGĀ MAI I LE TUSI PAIA

Ua aumaia i le Tusi Paia se vaifofō faigofie pe afai ua tatou manana’o e aitalafu se tupe. Ua ta’ua i le 1 Timoteo 6:6: “E moni, e tele mea e maua mai le faamaoni i le Atua ma le lotomalie.” I nisi faaupuga, o le iai o se uiga lotomalie, o le auala sili lea e ‘alofia ai āuga tigā ona o le faia o aitalafu. Peita’i, e lē faigofie ona maua le lotomalie i lenei lalolagi ua tumu i tagata e manana’o e vave faamalie o latou mana’oga. O i inā la e mana’omia ai le “faamaoni i le Atua.” I le ā le itu?

O se faata’ita’iga, na faaamua se ulugalii i Asia i tagata na maua o latou lava fale. O lea na la filifili ai e faatau so la fale e faaogā ai la la’ua teugātupe, faapea tupe na nonō mai i le faletupe ma o la tauaiga. Peita’i, e le’i umi ae o la lagona le mamafatū o le avega o le totogiina o aitalafu. Na alu uma lo la taimi e galulue ovataimi ai ma lē maua ai se mafutaga ma le la fanau. Na faapea mai le tane: “Na ou lagona e pei o loo o’u tauaveina se maa telē i lo’u ulu, ona o le popole, mafatia ma le lē lava o le moe. Na matua mamafatū la ma avega.”

Mulimuli ane, na manatua e lenei ulugalii upu o loo i le 1 Timoteo 6:6, ma filifili loa e faatau ese atu le fale. Na faato’ā uma ona totogi a la aitalafu ina ua mavae le lua tausaga. Na a’oa’o ina e lenei ulugalii se lesona mai i le mea na tupu ma faapea mai: “O le iai o se vaaiga faaleagaga e tusa ai o meafaitino, o le a avea lea o se puipuiga.”

Ua masani le to’atele i le alagāupu a le gagana Swahili lea na ta’ua i le amataga. Peita’i, e lē o taofia ai tagata mai i le faia o aitalafu. E tusa ai o mataupu silisili o le Tusi Paia na tatou iloiloaina, e atamai tele ona tatou manatunatu loloto i le fesili lenei, Pe e tatau ona ou aitalafu tupe? ■

## E faapefea ona a'oa'o fanau ina ia alolofa i le Atua?

E faato'ā mafai ona alolofa lau fanau i le Atua, pe a latou iloa ni faamaoniga o loo soifua moni o ia, ma e alofa mai iā i latou. Ina ia alolofa i le Atua, e tatau ona latou iloa o ia. (1 Ioane 4:8) O se faata'ita'iga, e ao ona latou iloa tali o fesili nei: Aiseā na faia ai e le Atua le tagata? Aiseā ua lē taofia ai e le Atua mafatiaga? O le ā o le a faia e le Atua mo tagata i le lumana'i?—**Faitau le Filipi 1:9.**

Ina ia fesoasoani i lau fanau e alolofa i le Atua, e tatau ona e faaalua atu iā i latou e te alofa i le Atua. Pe a latou mātauina lenā tulaga, o le a latou mulimuli fo'i i lau faaa'oa'oga.—**Faitau le Teuteronome 6:5-7; Faataoto 22:6.**

## E faapefea ona e pā'ia loto o lau fanau?

E matuā malosi le Afioga a le Atua. (Eperu 4:12) O lea, ia a'oa'o lau fanau i a'oa'oga faavae o le Tusi Paia. Ina ia pā'ia e Iesu loto o tagata, sa ia fai atu ni fesili, faalogologo lelei, ma faamatala atu Tusi-tusiga Paia. E mafai fo'i ona e faaa'oa'o i le auala na faia e Iesu, pe afai e te mana'o e pā'ia loto o lau fanau.—**Faitau le Luka 24:15-19, 27, 32.**

E lē gata i lea, o loo iai tala i le Tusi Paia i le auala na feutaga'i ai le Atua ma tagata, ma e mafai ona fesoasoani i lau fanau e iloa ai le Atua ma alofa iā te ia. O loo maua lomiga e fesoasoani i lau fanau i le Initaneti i le [www.jw.org/sm](http://www.jw.org/sm).—**Faitau le 2 Timoteo 3:16.**



Ia faaaogā mea e a'oa'o ina mai i le foafoaga, e fesoasoani ai i lau fanau ia iloa ma alolofa i le Atua



Mo nisi faamatalaga taga'i i le mataupu e 14 o lenei tusi, lomiga e Molimau a Ieova O loo maua i le [www.jw.org/sm](http://www.jw.org/sm), pe talosaga mo se kopi maua fua o lenei lomiga i se tuatusi o loo i le itulau e 2 o lenei mekasini

FAITAU I TALI O NISI O FESILI  
FAALE-TUSI PAIA I LE INITANETI



E maua lenei mekasini ma isi lomiga i le Initaneti e aunoa ma se totogi



Ua maua le Tusi Paia i le Initaneti i le silia ma le 100 gagana

Faaaogā le code pe taga'i i le [www.jw.org/sm](http://www.jw.org/sm)



wp14\_12/01-SM  
140912